

Headlines

1. मुखमंत्री उमर अब्दुल्ला होरें गुलमर्ग च कन्वेंशन सेंटर दा उद्घाटन कीता, आखेआ जे एहदे कन्नै गुलमर्ग गी वैश्विक सतह पर सैलानी थाहर बनाने च मदद होग।
2. भारत नै पाकिस्तान स्थित आतंकवादी संगठनें लश्कर-ए-तैयबा ते जैश-ए-मोहम्मद गी अफगानिस्तान दी जमीन दा इस्तेमाल आतंकवाद आस्तै नेई करन देने दी वैश्विक कार्रवाई दा आह्वान कीता।
3. केंद्री मंत्री डॉ. जितेंद्र सिंह होरें आखेआ जे उज्ज परियोजना गी होर बेहतर बनाने कन्नै जम्मू-कश्मीर ते पंजाब गी लाहू होग।
4. प्रधानमंत्री नरेंद्र मोदी हुंदे 75में जन्मदिन दे सरबंघै च लघु फिल्म चलो जीते हैं द प्रदर्शन मुख भरै च कीता गेआ।
5. मुख सचिव अटल डुल्लू होरें जम्मू-कश्मीर च माली समावेशन ते समाजी सुरक्षा स्कीमें दे असर दा जायजा लैता।

CM-Convention Centre

मुखमंत्री उमर अब्दुल्ला होरें अज्ज गुलमर्ग च इक कन्वेंशन सेंटर दा उद्घाटन कीता। इस मौके पर सभा गी संबोधित करदे होई मुखमंत्री होरें आखेआ जे इस केंद्र दा इस्तेमाल करना मता जरूरी ऐ तां जे एह सरकार उप्पर भार बनने दे बजाय आमदनी पैदा करी सकै। उनें आखेआ जे इस केंद्र दा इस्तेमाल ब्याहू कारज, MICE गतिविधियें बगैरा लेई कीता जाई सकदा ऐ जा फही कुसै कॉफी शॉप आस्तै लीज पर दित्ता जाई सकदा ऐ तां जे इत्थे मते थमां मते सैलानी औन ते अपनी बेहतरिन शाम दा मजा लैने लेई इत्थे कॉफी दा नन्द लैन। मुखमंत्री होरें आखेआ जे एहदे कन्नै गुलमर्ग इक प्रमुख वैश्विक सैलानी थाहर दे तौरा पर मजबूती कन्नै फही उभरियै सामने औग।

UNSC India Afghan

भारत नै संयुक्त राष्ट्र दी सूचि च दर्ज पाकिस्तान स्थित लश्कर-ए-तैयबा ते जैश-ए-मोहम्मद आतंकवादी समूहें ते उन्दे समर्थकें गी अफगानिस्तान दी जमीन दा इस्तेमाल, आतंकवाद आस्तै नेई करन देने दी वैश्विक कार्रवाई दा आह्वान कीता ऐ। संयुक्त राष्ट्र सुरक्षा परिषद दी होई दी बैठक च संयुक्त राष्ट्र च भारत दी स्थाई राजदूत होरें अफगानिस्तान दे आतंकवादी सोषण गी रोकने आस्तै वैश्विक कार्रवाई दा आह्वान कीता। उनें आखेआ जे भारत अफगानिस्तान दी सुरक्षा स्थिति पर नेडमी तक्क रक्खा'रदा ऐ। भारत दी स्थाई राजदूत होरें आखेआ जे भारत अफगानिस्तान दी मदद कन्नै म्हेशा अंतरराष्ट्री ते क्षेत्रीय सहयोग दा समर्थन करदा रेआ ऐ। भारत नै 22 अप्रैल दे पहलगाम आतंकी हमले दी अफगानिस्तान आसेआ कीती गेदी निंदेआ दा सुआगत कीता।

Ujh Projects

केंद्री मंत्री डॉ. जितेंद्र सिंह होरें आखेआ जे अज्ज मल्टीपपर्ज प्रोजेक्अ दे नमे सिरेआ ते उसी होर बेहतर सिरेआ लागू करने कन्नै पंजाब ते जम्मू-कश्मीर गी मते सारे ढंगै कन्नै फैयदा होगा। उनें आखेआ जे इस परियोजना दा पैहला प्रस्ताव तकरीबन 100 बरे पैहले दित्ता गेआ हा। मंत्री होरें आखेआ जे अज्ज परियोजना पूरी होने मगरा सिंधु जल संधि मताबक भारत गी आबंटित पूर्वी नदियें रवि, ब्यास ते सतलुज दे पानी दा इस्तेमाल च बाद्दा करोग तां जे पानी दी कमी गी दूर कीता जाई सकै। उनें आखेआ जे एहदे कन्नै पंजाब दे गुरदासपुर, पठानकोट ते जम्मू-कश्मीर दे साम्बा ते कठुआ च तकरीबन 90 ज्हार हेक्टर राईबाई आहली जिमीं दी सिंचाई च सहूलत होगा।

Seva-Parv Agriculture

सेवा ते सुशासन दे मंत्र कन्नै प्रधानमंत्री नरेंद्र मोदी हुंदे मार्गदर्शन हेठ सरकार परिवर्तन ते तरक्की आहने लेई अनथक मेहनत करा'रदी ऐ। अज्ज इस स्पेशल सीरीज सेवा पर्व च अस तुंदे ताई लेई आएं आं जे किश चाल्ली मोदी सरकार नै राईबाई च बदलाव आहनेआ ते करसानें गी सशक्त बनाया ऐ। पिछले 11 ब'रें दरान कृषि मंत्रालय दा बजट तकरीबन 22 ज्हार करोड़ रपे थमां

बधियै 1 लक्ख 37 ज्हार करोड़ रपे शा मता होई गेआ ऐ। करसानें दे हितें च लगातार कम्म करदे होई सरकार नै पिछले 11 बरें दरान खरीफ फसलें लेई घट्टोघट्ट समर्थन कीमतें च 81 प्रतिशत तगर ते 226 फीसदी तगर दी माली सुरक्षा यकीनी बनाने लेई सरकार नै प्रधानमीं किसान सम्मान निधि शुरू कीती ऐ।

GST-Reforms

जीएसटी दी दरें च हाल च सरकार आसेआ कीती गेदी कटौती दा जम्मू-कश्मीर दे लोकें ते कारोबारिएं सुआगत कीता ऐ। एहू नमियां दरां इस म्हीने दी 22 तरीक थमां लागू होई जाइना। अज्ज अस्स साइकिल उद्योग बारै गल्ल करगे। नमीं पीढी दे जीएसटी सुधारें तैहत साइकिल उद्योग गी बड़ा मता लाहू होग। एहदा मकसद आम आदमी आस्तै पर्यावरण स्हाबै इसी सखल्ला ते सस्ता बनाना ऐ। साइकिल पर हुन 12 फीसद दे बजाय 5 फीसद कर लगगोग।

PM-Chalo Jeete Hain

राश्ट्र पुरस्कार विजेता फिल्म 'चलो जीते हैं'गी अज्ज पूरे देसै दे लक्खां स्कूलें च ते तकरीबन 500 सिनेमा हालें च प्रधानमंत्री नरेंद्र मोदी हुंदे 75में जन्मदिन दे मौके पर प्रदर्शित कीता जा'रदा ऐ। एहू फिल्म प्रधानमंत्री मोदी हुंदे बचपन दी इक घटना थमां प्रेरित ऐ। फिल्म च इक जवान जागत बरू दी कहानी दस्सी गई ऐ जेहड़ा स्वामी विवेकानंद हुंदे दर्शन थमां मता प्रभावित ऐ ते अपनी निक्की नेई दुनिया च बड़ा बदलाव आहने दी कोशिश करदा ऐ। एहू फिल्म 2018 च रिलीज होई ही ते उस ब'रे दी सारें शा मती दिक्खी जाने आहली शॉर्ट फिल्म ही। 'चलो जीते हैं'फिल्म दा निर्देशन मंगेश हडवाले होरें कीते दा ऐ ते एहदे च प्रस्तुति आनंद एल.राय ते महावीर जैन होरें कीती ऐ।

CS Social Security Schemes

मुख्य सचिव अटल डुल्लू होंरें पूरे जम्मू-कश्मीर च लागू कीती जा'रदी बड्डे माली समावेश ते समाजी सुरक्षा योजनाएं दी प्रगति ते असर दा आंकलन करने लेई डिप्टी कमिशनरें ते वरिष्ठ अफसरें कन्नै उच्च स्तरीय समीक्षा बैठक दी अध्यक्षता कीती। इस बैठक दरान डुल्लू होंरें प्रधानमंत्री जन धन योजना, प्रधानमंत्री सुरक्षा बीमा योजना, प्रधानमंत्री जीवन ज्योति बीमा योजना, अटल पेंशन योजना ते बक्ख-बक्ख होर योजनाएं सने मुख्य पैहलकदमियें दा जायजा लैता। मुख्य सचिव होंरें इनें योजनाएं दे जमीनी सतह पर इन्दे असर दा आंकलन करने दे महत्व पर जोर भरेआ ते सरबंधत मैहकमें ते जम्मू-कश्मीर बैंक गी निर्देश दित्ता जे ओहू सब्बनें जिलें च इनें योजनाएं गी नमी गति देन।

SMVD-Yatra

श्री माता वैष्णो देवी जी दी यात्रा लेई पंजीकरण अज्ज दुए रोज बी जारी ऐ। 22 दिनें तगर बंद रौहने मगरा कल यात्रा परतिए बहाल होई ही। एहू यात्रा भारी बरखें ते ल्हास-पस्सियां पौने करी बंद कीती गई ही। कल 3500 श्रद्धालुएं श्री माता वैष्णो देवी जी दी पवित्र गुफा च मत्था टेकेआ। औने आहले दिनें च श्रद्धालुएं दी गिनतरी च बाद्दा होने दी मेद ऐ। यात्रा दे शुरू होई जाने पर श्रद्धालुएं खुशी जाहिर कीती ऐ जे कई दिनें दे इंतजार मगरा ओहू पवित्र गुफा दे दर्शन करी सकडन।

DIET-Poonch

पुंछ दे जिला शिक्षा ते सिखलाई संस्थान डाइट नै राश्ट्री पाठ्यक्रम ढांचा स्कूली शिक्षा यानि National Curriculum Framework-School Education विशे पर प्राथमिक अध्यापकें लेई इक विशेष सिखलाई कार्यक्रम दा आयोजन कीता। इस कार्यक्रम दा मकसद अध्यापकें गी शैक्षिक प्रिाएं ते समग्र बाल विकास दी डूंगी समझ कन्नै लैस करना हा। पुंछ जिले दे सब्बने 11 जोन थमां 75 शा मते अध्यापकें इस कार्यक्रम च हिस्सा लैता। समापन समारोह च प्रिंसीपल डाइट पुंछ यशपाल शर्मा होंरें प्रतिभागियें गी संबोधित करदे होई उनें शिक्षा दे नमें तरीकें गी अपनाने दे महत्व पर लोऽ पाई।